



## **TKRN - Infomesen bilong ol manmeri**

TK Reite Notebooks em i kamap long ples Reite, long Raikos, long Madang Province. Ol lain bilong ples ol i wokim wok long helpim kamapim dispela tulkit.

TK Reite Notebooks em i karamapim olgeta samting yumi nidim long rikodim save bilong tumbuna. Em bai helpim yumi long lukautim dispela save bilong igo long ol yangpela lain i kam bihain.

Dispela wok i gat bikpela rispek long kastom bilong ol grasrut manmeri, na rispek bilong tingting na aidia bilong ol.

Yupela yet bai rikodim kastom bilong yu long laik bilong yu.

Yu yet bai gat powa long stopim save i go aut long pablik, sapos yu i laik olsem.

Taim yu skenim ol notbuk pinis, yu save em i kamap wanpela permanen rekod nau. Yu bai inap long lukautim ol longpela taim, printim ol gen, o serim wantaim ol wantok. Wantaim dispela 'digital rekod', yu ken bungim na kamapim wanpela haus buk, ol i kolim laibri ('library') bilong olgeta save bilong man bilong wanpela ples o eria.

Lo bilong TKRN

Nogat man bai pusim ol long kam insait na wokim dispela wok. Yu bai wok long laik bilong yu tasol.

Yu yet mas i gat save na tingting long kam insait long dispela wok

Nogat pe. Ol dispela liklik buk ol i no bilong salim na kisim moni.

Yu yet bai mekim husait bai inap long lukim wanem samting yu bin raitim long ol liklik buk. Yu laik haitim bilong yu yet, o long femili bilong yu, em i orait. Yu laik em i stap long kompyuta bilong taim bihain, em i orait. Yu laik em i go aut long pablik, emi orait tu.

Em i samting bilong yu.

Long nambawan pes bilong olgeta liklik buk, igat sans bilong yu mekim klia dispela laik bilong yu.

## **Askim na bekim long TKRN:**

Nem bilong projek?

- TK Reite Notebooks/TK Reite Notbuks

Bilong wanem mi stap insait?

- Yu yet bin tok olsem yu gat interes long rikodim na lukautim save bilong yu, tumbuna bilong yu, na ol ples bus graun bilong yu.

Dispela projek em i wanem samting?

- Long dispela projek, mipela bai helpim yu long usim pepa, pen sisis na kompyuta long rikodim save bilong yu.

Bai mi mekim wanem?

- Yu bai kisim save long katim na foltim pepa bilong mekim liklik buk. Yu bai pulimapim liklik buk long laik na save bilong yu. Sapos yu laik, mipela bai helpim yu long stetim gut liklik buk yu wokim insait long kompyuta. Mipela bai bekim bek liklik notbuk bilong yu.

Hamas taim bai mi wok long projek?

- Em bai long laik bilong yu tasol.

Mi bai kisim wanem bekim long projek?

- Yu bai no inup kisim moni, o narapela bekim long wok bilong yu insait long projek. Insait long wok bilong projek, bai yu luk save long wok bilong rikodim kastom, na bai yu gat sans long tingting ken long powa na strong bilong kastom na save bilong tumbuna.

Projek bai bagarapim bodi o tingting bilong mi?

- Nogat. Nogat wanpela samting bai kamap long yu long sait bilong helt o long wari long stap insait long projek.

Inap mi lusim projek sapos mi les long wok bung wantaim?

- Yes. Sapos yu lusim, ol man insait long projek bai no inap bel nogud o kisim wari wantaim yu.

Ol man bai baim liklik buk, o save mi raitim igo long en?

- Nogat. Dispela projek emi no bilong kisim save bilong salim. Sapos yu tok orait long putim liklik buk bilong yu long pablik, em bai fri long ol man lukim. Mipela husait helpim yu long projek bai no inup salim, na mipela no inup wokim bisnis long dispela save.